

欽定剿平粵匪方略

欽定勦平粵匪方略卷九十二 甲寅年

五月初一日 己亥和春福濟奏言查廬城賊匪被

官軍擊敗入城勢已窮蹙防範愈嚴必須設法
暗圖方克有濟現飭各營添置攻城要需擬於
夜間出其不意或由雲梯而上或設法轟陷以
圖克復提臣秦定三已行抵正陽關因該處地
勢四通八達當飭郝光甲劉玉豹於水陸隘口

分紮營盤扼要防守並相機進剿六安霍邱以
遏賊匪北竄其貴州官兵一千名於秦定三起
程後始到廬州卽飭趕緊前往計此時可到正
陽至舒桐安慶等處逆匪占踞如故地方紳民
多已遷避現飭知縣張埴前赴南鄉招集團練
極力堵禦斷賊接濟如廬州及早得手更可激
勵該二縣紳耆設法解散賊黨其江浦六合等

縣逆船時往滋擾該處緊接和州此時廬郡勦
捕喫緊無兵可撥已飭該州金寶樹督練防範
毋任闖入

和春福濟又奏言金州副都統薩炳阿在巢湖
烏江一帶勦賊於四月十一日病故該處防務
未鬆必須另揀大員前往督辦以資得力前因
副都統忠泰患病未能前往現在病愈仍令帶

聞

同吉林官兵剋日馳往督同原派兵勇相機進剿奏入均報

同日江西巡撫陳啟邁奏言江西籌辦戰船已成三十隻其餘二十隻亦將工竣惟應用銅鐵各礮約需三百餘尊江西舊存礮位堪以配置戰船者不及三分之一專望廣東購備運江應

用前經請

旨飭催未知能否及時解到其雇募水勇兩月以來僅募千餘臣到任後於各項兵勇中量爲抽撥配駕戰船上緊演試以足三千之數現在長江上下游逆船充斥江省惟有戰艦五十隻若遽駛至湖北援剿究恐孤軍深入擬俟配齊礮位並確探曾國藩大隊舟師將出楚境方能約會夾

擊計出萬全

陳啟邁又奏言臣疊據探報近有賊船數百隻駛入湖口越過南康轉入饒河湖口及安慶東流一帶賊船停泊不少查饒河可達廣信恐竄廣饒擄掠糧食或以小股分擾牽掣我師而以下游停泊之船乘風直上窺伺省垣賊情詭譎不可不防當卽飛飭廣饒二府文武設法堵剿

並酌撥兵勇應援省垣亦密爲布置以備不虞
奏入

上命軍機大臣傳諭陳啟邁曰此次江西籌辦戰船爲
數無多以之遠出赴援雖形單弱若以備本省防剿
之用足敷調遣現在賊擾湖南曾國藩舟師一時未
能東下據該撫奏稱現有賊船轉入饒河該省毗連
湖南湖北處所均有匪徒出沒所有本省各隘口需

用水師之處正復不少著卽將已造船隻配齊礮械
派員督率兵勇駛赴本省要隘以資防勦仍一面督
飭趙如勝等趕緊訓練水勇一面於現造各船外陸
續添造總期聲勢聯絡相機進剿不得株守一隅置
礮船於無用之地至廣東購備礮位並著該撫與葉
名琛等妥商速辦

初二日

庚子

都察院左副都御史王履謙奏言臣

從上游折回陳橋鎮當查東路賊匪有裹脅餘
黨陸續潰逃此等兇悍性成難保不日久蟻聚
餘燼復燃亟須上緊偵拏況賊竄連鎮尤恐潛
通勾結因思劉口董口有鎮道督飭查拏柳園
蘭儀有河臣扼要控馭惟豫東交界之曹考一
帶兵勇甚單不足以資偵緝臣卽馳往該處派
員搜拏先後擒獲三四百名日內漸就肅清臣

聞

擬卽渡河往查南岸上下游以昭嚴密奏入報

初三日

辛丑

勝保奏言臣抵連鎮後連日察看逆

賊於連鎮東西已紮木城拏獲奸細供稱該匪

急思竄逸而又不敵是以暫行堅匿死守臣因

步隊已到當於二十九日督飭官兵進攻西岸

賊巢由西南進兵勇直前攻撲施放噴筒火彈

將賊壘房屋燒燬賊見火光四起情急竄出經
兵勇擊退因東北風大作沙塵揚起煙燄回撲
不能前進查該逆竄踞連鎮地勢雖寬然較之
在獨流時人數已少所築濠柵木城其牢固嚴
密亦較獨流爲不逮似尙有隙可乘惟其伏匿
不出槍礮從暗擊明兵勇仍多受傷若不設法
攻取徒耗精銳似非善策臣前在梁王莊所製

撫牌可資抵禦因獨流地勢難用是以交存天津現已飛調來營激勵兵勇總期及早破入或偏令出巢奔竄我兵卽可得手

勝保又奏言臣前經奏明擬派得力馬隊馳赴楚豫防剿現在新調之吉林馬隊尙未到營賊匪盤踞連鎮分占各村東西兩岸地勢甚寬臣所帶馬隊派撥西岸七百餘名防景州一路東

聞

岸一千四百餘名防德州一路正東及東南面
責成德勒克色楞與培成那敷德嚴防此時馬
隊官兵僅敷剿辦勢難分撥應俟新調吉林馬
隊到日再行派赴楚豫防剿奏入均報

初四日 壬寅 僧格林沁勝保奏言逆匪自竄踞連

鎮堅匿死守誘之不出現在西岸長濠不日工

竣卽飭各營沿濠紮營以資圍剿臣等酌商同
時四面合攻使該逆應接不暇自易得手四月
二十九日臣僧格林沁督帶馬步官兵攻撲賊
巢東北西北二面臣勝保進攻西南賊營各斬
擒賊匪百餘名及數十名不等惟時東北風作
煙燄回吹又兼河隄之上風起沙揚未能得手
是以督令收隊奏入

上命軍機大臣傳諭僧格林沁勝保曰賊匪竄踞連鎮已越兩旬仍未殄滅朕心實深焦急勝保統帶得勝之兵馳抵連鎮已及十日正當與僧格林沁同心協力設法進攻以期迅殲羣醜如能遏令奔竄務當前截後擊設伏以待斷不准令該逆再踞他處致滋蔓延

同日勝保德勒克色楞崇恩奏言查連鎮逆匪

知東南一帶布置較密乘隙於五月初二日帶
騎馬賊二千餘名從正東突出由甯津六路分
竄臣勝保得信後傳知各營合力圍擊卽親督
馬隊跟蹤追勦該逆先向許王村地方旋折而
南取徑吳橋比及追至復折向西南因柘園鎮
地方臣崇恩派有兵勇防堵又折向東南竄去
臣德勒克色楞亦帶蒙古馬隊趕來會合前進

其連鎮後隊賊匪由臣僧格林沁等相機勦辦
臣崇恩於偵實後卽派兵分路追勦並飛飭地
方營汛文武一律嚴防臣崇恩因賊後隊尙在
連鎮慮其續向南來未敢移兵隨同南下奏入

上命軍機大臣傳諭僧格林沁勝保曰據勝保等奏逆
匪帶騎馬賊二千餘名從正東突出由甯津大路分
竄復親督馬隊跟蹤截勦該逆由吳橋柘園鎮一帶

折向東南分股南竄僧格林沁近在連鎮何以未據
奏報勝保所奏僅云在平原恩縣一帶賊蹤究在何
處亦未能確實指明逆匪詭譎異常又係騎馬逃竄
其勢剽急必須探明追剿迅速殄滅勿令此股竄匪
占踞村鎮以致牽掣我軍逆匪係由連鎮東面竄出
該處有培成那敷德在彼堵禦何以毫無知覺任令
該逆肆行奔突培成營盤前在阜城被賊焚燬此次

又復失事著僧格林沁確切查明貽誤情形據實嚴
叅連鎮賊匪旣已分竄其勢益孤僧格林沁正當督
飭將弁乘勢進攻爲一鼓殲除之計如該逆全數南
竄務卽督帶馬步各隊奮力追剿斷不可稍涉觀望
致誤事機崇恩現在德州仍當探賊所向相機截剿
毋得專事株守

同日閩浙總督王懿德奏言 臣欽奉

諭旨令於福建挑兵二千名前往向榮軍營聽候調遣
查現在漳浦雲霄等處雖疊獲勝仗而詔安銅
山餘匪未靖各營兵丁勦辦本省賊匪尙形單
薄一時萬難抽調惟有籲懇

皇上鴻慈俯准將應調各兵暫緩抽撥臣仍察看情形
一俟防務辦理就緒卽行調赴江南協勦奏入
上命軍機大臣傳諭王懿德李廷鈺曰王懿德奏漳浦

等處餘匪未靖各營兵丁勦捕尙形單弱未便抽調
自係實在情形但金陵現在攻勦喫緊該處官兵不
敷分撥自應移緩就急著王懿德等卽飭水陸文武
各員剋期將閩省土匪勦辦完竣仍遵前旨將前調
官兵飭赴江南交向榮調遣毋得藉詞延宕

初五日

癸卯

僧格林沁西凌阿托明阿奏言臣僧

格林沁於五月初二日據勝保差人聲稱探得

賊匪由連鎮南面逃竄勝保會同德勒克色楞
善祿就近帶同培成那敷德督領各路馬隊官
兵跟蹤追擊生擒逆匪一名訊據供稱僞丞相
林鳳詳帶騎馬賊一千名逃竄欲往臨清迎接
南來賊匪該逆前隊騎馬賊約有二千餘名已
由德州之東十餘里地方向南奔竄該大臣已
督兵連夜追擊臣僧格林沁現分撥馬隊在東

南西南列隊儻該逆續有竄逃卽可就近截勦
至大股賊匪現在仍踞連鎮及附近各村臣等
惟有激勵將士相機進勦奏入

上命軍機大臣傳諭僧格林沁曰本日僧格林沁馳奏
各情與勝保昨日所奏不符是否培成前因失事獲
咎此次與那敷德防堵東面恐負罪更重遂以賊由
南面竄出飾詞具報該大臣不察虛實據以入奏且

勝保於二十三日到連鎮後其善祿帶領步隊於何日到營未據僧格林沁等奏及此次勝保摺中亦未言會同善祿跟追並帶同培成那敷德勦賊之事該大臣雖駐兵連鎮北面相距非遙何以所探情形毫無確信可見該大臣與勝保共辦一事聲勢絕不聯絡以致圍攻不密該逆得乘閒脫逃至該大臣分撥馬隊在東南西南列隊防賊竄固屬要著惟不可

徒事分防毫無把握該大臣等均經朕特簡辦理軍務若不能和衷商榷迅速勦捕何日始能了事該逆精銳既已南竄且賊目亦已逸出所存連鎮餘匪務當剋日籌攻悉數殄滅萬不可再令分股奔突止冀直境肅清便謂可以塞責仍將諭詢各情迅速詳查具奏

同日袁甲三奏言逆船連日上竄約有五百餘

隻停泊和州大東門外接連鮎魚嘴搭蓋土木
城四出擄掠所得糧物屯積城內人口均羈押
船上並分擾含山又於江浦縣張貼僞示嚇令
百姓歸從人心甚屬驚惶現在皖省大江以南
徽甯等府久已聲息不聞儻和州再有梗塞則
江南文報更屬隔絕且前次和春等拏獲奸細
搜出僞稟有約會至店埠斷絕廬州糧路之說

臣拏獲販馬奸細亦有俟南京逆賊到齊分路北犯之語現聞廬城之米均已由丙子鋪上船運往江甯且不惜重價多購馬匹是其志不僅在廬州已可概見況北賊一日不盡卽南賊接應之志一日不息儘和州之賊竟與廬六會合併力北竄大局更難收拾和春等圍攻廬州正在喫緊之際勢難兼顧和州該處距金陵僅九

十里如遇順風頃刻可到應請

飭令向榮迅速派兵就近追勦以杜勾連臣聞前次江
六告警琦善飛調派防宿遷官兵千餘名移紮
浦口旋因逆賊擊退仍卽停止現在南賊日肆
詭謀應請

飭令琦善將此項官兵調赴滁和關山一帶擇要扼紮
既可爲廬郡聲援並可爲江六接應似較株守

宿遷更爲得力奏八

上命軍機大臣傳諭和春福濟袁甲三曰逆匪掠糧屯積城內並分擾含山是和州地方已爲賊踞該處陸路直達廬郡水路直通巢縣卽定遠等處均有僻路可通若竟被匪占踞不但江南文報阻隔更恐其北竄店埠柘皋斷絕廬州餉道和春等頓兵堅城於皖省全局輒稱不能兼顧致令逆賊來往自如將廬州

米石任意運往金陵該提督等毫無杜絕之策實堪
痛恨琦善派防宿遷官兵折回後能否全赴滁和一
帶向榮軍營官兵屢經分撥赴皖能否再撥均未可
定江南江北固應不分畛域本省軍務又豈能專恃
援兵著和春福濟一面迅圖克復廬州一面酌量撥
兵策應和州庶可與琦善向榮所撥之兵前後夾擊
儻仍專顧廬州致和州賊交負隅自問當得何罪袁

甲三現駐臨淮距關山甚近惟當酌量緩急情形派撥兵勇進剿以遏逆賊北竄之蹤亦不可專待琦善向榮撥兵致滋貽誤

上又命軍機大臣傳諭琦善向榮曰逆匪上竄和州並分擾含山距廬州定遠均屬相近萬一與廬州賊匪會合併圖北竄勢將不可收拾此時總以合力扼截遏其竄路爲第一緊要琦善前此留防宿遷之馬步

官兵一千餘名本爲防山東竄匪而設現在已酌量
撤回著琦善卽將此項官軍迅飭原帶之都司羣壽
等全數帶赴和州相機防勦江浦六合防兵亦可就
近援應毋得遷延貽誤致失事機向榮近在對岸應
如何酌量分兵渡江至滁和一帶截勦務卽迅速籌
辦不得以株守堅城遂置江北大局於不問

袁甲三又奏言渡黃南竄餘匪意欲由蒙城直

撲懷遠奪路渡淮旋因探知懷遠有備且臣所
派兵勇均由懷遠一路前進該逆遂於十八日
西竄旋經團練截殺該逆復折向南竄臣所派
兵勇遂由蒙城東路飛向南路追勦行至呂望
集遇鳳臺縣屬之展溝集練總王恩綬等解送
逆賊據稱該逆奔至該集經團練四面圍勦擊
殺三百餘人內有僞丞相陳姓首級尙有數百

人乘夜四路窮奔約計程途已遠追趕不及且恐北路豐縣另股賊匪續來遂折向蒙城暫駐旋探該逆於二十日竄過潁上境內經各團練截殺甚多復繞向正陽之西八里塚擄人奪船意欲由彼偷渡經秦定三督兵渡河擊殺殆盡尙餘二三百人由垂岡集竄往霍邱欲歸六安復被參將劉玉豹等圍困必可悉數斬擒此次

展溝集團練同心敵愾洵屬深明大義應請將
文生王恩綬

賞加縣丞銜武生賈鵬霄以經制外委拔補童生王恩
福給予八品頂戴庶幾聞風觀感人懷同仇之
志奏入

上從之

同日河南南陽鎮總兵柏山奏言臣現帶官兵

祇有二百七十名勢難出省勦賊頃探賊匪直撲荊州欲犯襄樊其漢陽等處逆匪被官兵勦敗餘賊竄至河口及黃安等處焚殺擄掠民心忿怒聚集團練約會殺賊舒倫保計已馳抵武勝關正可與台湧乘此人心忿激之時合力進擊該逆必不敢復窺信陽至信陽及武勝等關所駐之兵臣前已交南汝光道余炳燾統帶設

防荊州與襄陽唇齒相依襄陽又爲豫省門戶
由新野南陽入豫平坦大道新野並無防兵南
陽兵力太單僅有襄城營防堵兵三百名臣之
印務又未經撫臣委員接署現在沿邊一帶千
有餘里旣無大員又乏重兵地方實屬緊要臣
責無旁貸不敢深入楚境致令首尾不顧當卽
飛移余炳燾等督率兵勇於各要隘加意嚴防

並多設偵探隨時移知臣營以資策應臣卽帶領官兵前赴新野迤南楚豫交界之新店鋪駐紮防堵如有警報卽帶兵前往接應並可與台湧舒倫保聲勢聯絡互相策應現聞河北地方肅清如能移得勝之兵由信陽南陽兩路夾擊並湖北兵勇合力攻勦必更得手奏入

上命軍機大臣傳諭英桂楊需鄭敦謹柏山曰柏山所

帶之兵僅有二百七十名卽出省剿賊亦屬無益著
英桂等卽飭該總兵於豫省邊界扼要駐紮嚴密防
堵新野南陽等處爲毗連楚省要地卽責成該總兵
竭力防守斷不准令楚北賊匪乘閒闖入儻有疏虞
惟柏山是問仍飭該地方文武團練民勇合力設防
毋稍鬆懈前據楊需奏稱前往信陽光州南陽周歷
履勘是否已經起程著於楚皖豫交界之處察看何

路緊要卽赴何路協同防勦不可株守一隅顧此失彼柏山究應駐紮何處卽著英桂等妥籌調遣

初六日

甲辰

勝保奏言逆賊竄恩縣後在關廂造

飯一聞官兵追到卽復乘夜南竄時臣所帶馬

隊皆已疲乏初三日追及腰站地方該逆卽乘

馬飛奔臣傳令截殺隨擊隨散立斃賊匪數十

人據生擒賊供該逆恐官兵攻克遼鎮卽不能

逃是以商同老賊欲騎馬渡河而南否則或奔
東昌濟甯一帶希圖占踞一處裹脅良民分我
兵力又供稱逆首李開芳先行林淵詳仍在連
鎮臣當卽督兵馳至高唐州該逆甫至東關街
內我兵馬隊已到三百餘名臣分撥一半在外
接應一半衝入街內擊殺不令該逆稍緩喘息
我兵在街內殺斃多名詎該州兵丁僅數十名

練勇三四百名俱因賊行太速未知賊來以致
東門大開該逆見我兵殺入關廂遂全行入城
將城門堅閉我兵未得痛勦臣現已派撥馬隊
馳赴荏平一帶設伏惟有極力追勦迅圖殄滅
再行北向迎擊其步隊官兵已咨會善祿仍令
會勦連鎮餘匪

勝保又奏言賊情狡猾異常現在急欲免脫無

論賊首在內與否其前隊必皆精銳老賊稍一放鬆卽中奸計必致各處裹脅又張賊勢臣再四酌度必須親自督勦是以選調馬隊星馳前來而步隊各兵仍留連鎮與僧格林沁會勦臣到高唐後德勒克色楞培成那敷德亦帶馬隊趕到臣令於城廂西面分布無論賊由何處竄出一面截殺三面救應該逆惟欲速奔未攜槍

礮而行聞其在恩縣擄取擡槍數桿高唐本有
武營兵雖調撥出征而軍裝火藥必有存營者
又爲所得昨令馬隊直逼南關東關城下詎逆
在城頭用擡礮擡槍向外施放觀其抗拒情形
必有賊首在內此時惜無步隊又無礮位不能
立時攻入臣已飛咨崇恩就近速撥步隊兵勇
並飛調大營步隊數百名星夜前來如其在城

死拒卽當設法攻偏而出以期殄滅無遺奏入
上命軍機大臣傳諭勝保德勒克色楞崇恩曰逆匪乘
馬逃竄雖甚剽疾究在恩縣腰站均有逗留崇恩所
派參將定順遊擊文英設伏之兵何以未見要擊高
唐州城兵勇雖單該州知州究在何處何以我兵在
關廂殺賊尙不知閉門拒守殊出情理之外此股竄
匪無論有無逆首在內總宜迅速剿滅若稍事耽延

使賊喘息已定不但南奔東昌濟甯爲可慮卽該州城內之人被其裹脅勦辦亦已不易且恐連鎖之賊再有續竄勝保大軍必至腹背受敵現在已諭僧格林沁照勝保所請迅撥步隊前往接應善祿步隊官兵於何時馳抵連鎖此次曾否折回南路疊次奏報未據敘及今勝保處旣急需步隊卽可令該將軍統帶前往仍合爲一軍以資得力連鎖至高唐州尙有

二百餘里恐步隊行走稍遲所謂就近地方兵勇著
崇恩星夜撥往不准片刻遲延附近各處有存營大
礮比之大營調用較爲近便亦著飛調解往總以神
速爲要東昌濟甯皆係繁富之區水陸衝途極關緊
要該逆旣萌窺伺之心難保其不鋌而走險儻毫無
準備又蹈高唐故轍雖有大軍緊追亦難殲除淨盡
崇恩現在德州所有東昌濟甯防守事宜卽責成崇

恩督飭厲恩官黃良楷等嚴密防備多設偵探一聞賊蹤入境卽行盡力兜截與大軍前後夾擊儘稍有疏失惟崇恩是問不能專諉之地方文武也本日復諭百勝王夢齡酌撥兵勇渡河迎截其能否得力雖未可知究竟南路又多一隊截勦之兵亦可稍助兵力著勝保一併飛催前來統歸調遣其高唐州文武下落卽著迅速查明如有逃避情事卽行嚴叅治罪

上又命軍機大臣傳諭僧格林沁曰竄匪奔入高唐州
城閉門拒守訊據獲賊供稱有占踞東昌濟甯之意
勝保進剿之兵並無步隊又無礮位著僧格林沁迅
撥步隊精兵千名星夜趕赴高唐飭令剋期到齊不
得稍涉遷延應帶礮位亦卽設法攜帶並著飛飭善
祿仍令馳往勝保軍營會剿並可統領步隊前行至
連鎮賊匪尙有逆首在內尤當迅籌攻克不得更令

乘間免脫

上又命軍機大臣傳諭百勝王夢齡曰逆匪竄入高唐
州城雖經勝保等派撥馬隊馳赴在平設伏截勦惟
逆勢剽疾利在奔突若堵勦稍遲該逆由山湖兩路
直趨而南則豐沛一帶適當其衝一經乘虛偷越渡
河必致復肆臨張仍圖北犯此時惟當前後夾擊務
將此股兇悍老賊就東境截殺無遺方爲上策百勝

王夢齡前奏備防兵勇尙不單薄各屬紳耆自練民
勇亦均可協同攻守著百勝等派撥兵勇嚴扼黃河
要隘一面飛探賊情相機渡河於北岸迎勦總期併
力殲圍毋任再有竄逸儻河防稍有疏虞任令賊蹤
闖入朕惟知以軍法從事勿以節次嚴旨視同具文
也

同日台湧奏言臣先飭叅將隆安等前往德安

進剿遊擊吳登鼈等帶兵繼進並令佈克慎管帶提標官兵接踵馳往旋接隆安等稟報德安賊衆概由水路陸續潛往漢口當將城池收復又據署雲夢縣知縣徐步雲稟報該縣城內之賊亦相率退往下游臣正飭將弁相機進剿詎知安陸下竄之賊於四月初六日由石牌地方乘間竄入荊門州城初九日竄往荊州被滿漢

官兵擊敗卽由荊門州屬之沙洋回應安陸該郡城僅有兵丁七十餘名城遂失陷十九日賊出北門似欲回竄隨州臣所帶之兵分飭前往德安僅有武勝關帶來之陝甘兵五百名殊形單薄因思佈克慎所帶提標官兵較爲得用卽經趕調折回並先行飛飭隨州知州楊嘉運督帶練勇迎擊賊於二十三日竄至該州西南鄉

之朱家集地方該員已調集練勇千餘名馳往堵剿維時黃土關之陝甘兵已出關臣遂以此隊派歸佈克慎督飭仍往德安防賊由水陸潛竄府河臣卽親督提標官兵並武勝關之陝甘兵前往隨境剿辦以破其後路牽掣之計又咨商舒倫保由東旺催齊所帶之兵趕來接應其桂明所帶之兵如已渡河馳抵許州當可直趨

樊城由棗隨一帶前來會合進勦青磨望援甚切臣處俟各路兵力稍集卽當迅圖攻復漢陽惟現聞漢陽賊衆有全股由襄河大趨荆襄之說臣當統兵抄出其前迎頭截擊而武昌亦須分兵過江盡力尾追奏入

上諭曰現在湖北情急勢迫總以扼其北犯及上竄荆襄爲要安陸文武查明概行正法柏山雖係隔省大

員亦可據實奏

同日陳啟邁奏言查副將羅玉斌管帶赴楚援兵一千名取道義甯相機前進行至中途聞通山賊氛甚熾遂於江楚交界之南樓嶺暫時屯紮詎賊分三股撲營愈聚愈多該副將因眾寡不敵折回義甯州城賊見我軍撤動乘勢闖入至江西解赴湖北餉銀先由九江次改義甯嗣

復繞道湖南不知能否解到尤深焦灼奏入

上命軍機大臣傳諭陳啟邁曰前因湖北崇陽通山一帶賊衆肆擾其地與義甯接壤疊經諭知該撫迅催帶兵赴楚之羅玉斌星速前進茲據奏稱該副將於江楚交界遇賊接仗失利折回義甯是楚省賊匪已闖入江西邊境著卽嚴飭羅玉斌督兵竭力固守萬不可令該處州城再有失事致干重罪該撫所派

州兵勇馳往協防務當飛速前進不准稍有延誤如
江境之賊擊退仍飭羅玉斌帶兵赴楚將崇通匪徒
協力剿除以爲楚省援應所有解往湖北之餉銀並
應解金陵兵餉均著悉心籌畫設法運往不得因道
路梗阻任意稽延

陳啟邁又奏言查江西彭蠡姑塘江湖遼闊溯
流而上亦均無險可憑擬於南康府上下將新

造戰船三十號小船百餘號配載各勇二千有
奇擇要駐泊無事則勤司操練有警則出隊堵
擊兼備火攻舟筏相機施用再選陸路兵勇二
千名分紮兩岸爲犄角之勢以作聲援仍俟探
明侍郎會國藩擊賊東下卽行整師會剿又准
湖南撫臣駱秉章咨逆匪擾及湘陰甯鄉湘潭
等處請飭派兵勇一二千赴交界之袁州吉安

二府會剿亦卽酌撥兵勇分馳堵禦但江省額
兵本少前已派兵勇千名應援湖北更覺不敷
調遣臣惟有殫精竭慮審度機宜妥爲調度

陳啟邁又奏言查九江府屬之龍開河地方有
賊船數百隻停泊該匪紛紛登岸經該處文武
督兵迎剿先後在蛇岡嶺等處接仗彼此互有
殺傷該逆分股由僻路繞至東林地方將該處

聞

廟宇民房焚燬又經官兵轟擊斃賊多名餘逆
退竄回船奏入均報

初七日乙巳僧格林沁西凌阿善祿托明阿奏言

查連鎮之賊雖有潰逃其大股逆黨仍前死拒
初三初四等日乘夜攻撲東南長濠西凌阿明
慶督帶官兵奮力攻擊斃賊不計其數臣善祿

聞賊竄往東南隨帶步隊同蘊秀所帶吉林馬隊尋蹤追趕沿路隨問鄉民據云賊東赴吳橋由陵縣竄至恩縣騎馬賊約一千數百人每過鄉莊徧脅民人牽馬聽用節節替換聞有兵追復由恩縣向南逃奔是大股賊匪尙在連鎮圍勦仍當喫緊計逃出之賊至多不過二千人有勝保等足資勦辦臣部馬隊已交蘊秀帶領緊

追臣於初四日仍折回軍營奏入

上命軍機大臣傳諭僧格林沁曰逆匪攻撲長濠雖經
我兵擊敗惟賊情詭譎仍恐聲東擊西再圖乘虛竄
逸現在勝保等已成尾追之勢設連鎮逆匪再行竄
出必致腹背受敵且該逆沿途裹脅兇燄復張勦辦
更形棘手該大臣總當督飭將弁迅將此股餘匪就
地殄除即使誘令離巢亦當設伏要截斷不可任其

四路狂奔或另踞村莊以致蔓延爲患勝保所帶官兵全係馬隊此時逆匪竄踞城池必須步隊官兵協剿著僧格林沁仍遵前旨迅撥步隊精兵一千名酌帶礮位卽交善祿統帶星夜趕赴高唐與勝保等合力攻擊萬勿遲延

同日崇恩奏言逆匪竄至高唐城池失守臣卽帶兵馳赴該州與勝保會商剿辦並嚴查失事

文武員弁是否畏葸先逃從嚴懲辦臣布置未能周密愧憤實深請

旨先將臣交部嚴加議處至臣現在紮營之富馬營地方爲德州北路要隘北爲柘園鎮接應南爲州城屏障未便撤防應派參將玉山帶領德州兵五百名仍前駐紮加意防守柘園鎮原派兵勇應由署登萊青道張鳳池等統帶嚴防其德州

防守事宜已飭督糧道姚錫華會同新任城守尉瑞成督飭文武和衷商辦柘園鎮富馬營兩處防兵並歸姚錫華調度奏入

上諭內閣曰連鎮賊匪竄入高唐州城該州知州魏文翰守備吉麟毫無準備致被賊匪竄踞著崇恩查明如有畏葸逃避情事卽行嚴叅治罪崇恩未能先事防範著交部議處

崇恩又奏言臣拏獲奸細杜有仲據供初二日
逆賊林姓由連鎮竄出先向正東又向西南再
向正南繞路奔竄聞得臨清一股剿滅淨盡令
伊改裝潛赴連鎮與賊目金姓等送信不必再
等救兵囑其卽刻回南又據供連鎮餘賊尙有
二三千騎馬賊有六七百名火藥將盡惟思南
竄至於賊目吉汶元已在阜城被兵轟斃奏入

報

聞

同日和春福濟奏言廬城逆匪經官兵節次進
勦勢已漸蹙惟有堅伏死守臣等前派勇敢得
力弁勇密授機宜設法進取迅圖克復因雨未
能進兵二十七日午後雨勢稍止卽於是夜四
更帶領兵勇潛赴城下計圖登城詎雨後城河

水漲溜勢甚急未能搭橋無從飛渡隨督隊赴
北門進攻揮令兵勇奮力轟擊逆匪於城上開
放槍礮回拒相持甚久未能得手現在雨猶未
止一俟天氣稍霽仍當趕緊設法攻取斷不敢
稍有稽遲奏入

上諭曰仍應盡力攻擊迅圖克復汝二人責在全皖今
一處之賊尙不能勦盡亦何顏對朕耶

上命軍機大臣傳諭和春福濟曰逆匪占踞廬州已及半載福濟統轄全省和春專辦廬州軍務若能將逆匪及早殲除何至籌餉撥兵毫無善策現在北竄之賊尙未殄滅楚豫交界處處設防若坐擁重兵一籌莫展和春福濟豈能諉罪耶

和春福濟又奏言查臨清竄回之賊經勝保擊敗竄至正陽關旋經秦定三督帶官兵水陸夾

聞

攻殲斃賊匪多名連獲勝仗民心安定六安廬
州之賊聞風膽寒諒不敢再窺北路奏入報

同日長臻奏言現在德安應山一帶賊雖退出
兵力正單固原提臣桂明自劉口起程前赴武
勝關進剿足爲諸軍援應已於四月二十七日
行抵蘭儀率領全隊過河王履謙前赴下游巡

查臣仍駐守陳橋鎮爲柳園蘭儀二口策應奏
八

上命軍機大臣傳諭長臻曰長臻現駐陳橋爲柳園蘭
儀二口策應盤查奸匪責無旁貸近日連鎮逆賊分
股竄至高唐勝保已督率馬隊跟蹤追剿沿河一帶
尤當嚴防偷渡該河督卽飭河工地方文武併力搜
捕毋稍疏懈

聞

長臻又奏言臣接據探報賊匪竄入應山隨州
時先令奸細至信陽州探路一面張貼僞示聲
言搭造浮橋後卽取三關北上以期搖動人心
嗣聞兵勇防守較嚴陸續退回漢口又經官兵
連獲勝仗截奪輜重米糧甚多賊始蒼黃失措
紛紛潰散現聞武昌等處均無賊蹤奏入報